

Kommune Kujallermi meeqqanut atualinngitsunut Piukkunarsarfik pillugu naapeqatigiinneq:

Piukkunnarsarfik sunaava?

Nunaqarfinni Aappilaattuni, Narsarmijini, Tasiusami Ammassivimmilu ingerlanneqarpoq oktober 2005-imiit ulloq manna tikillugu.

Nunaqarfiit taakku meeqquveqanngillat, nunaqarfinnilu ilinniartitsisuusartut ukiuni siuliini oqaloqatigisarnerisa paasinarsisippaat nunaqarfinni taakkunani meeqqat atualeraangamik atualernissaminnut piareersimasarnerat annikitsuinnaasartog.

Ajornartorsiut tamanna tunngavigalugu 2004-p missaani Nanortalimmi kommunalbestyrelsiusimasut ilaasortat ilaasa anguniagarilerpaat meeqqat atualinnginnerminni piareersimanerunissaat anguniarlugu suliniuteqartoqassasoq.

Taamaasilluni Piukkunnarsarfik nunaqarfinni taakkunani sisamani pilersinneqarpoq. Ullormut suli-sup nal. akunneri sisamat atorlugit meeqqat sullittarpai atuarfiit atuartsinerisa nalaani.

Anguniarneqarpoq meeqqat 3-niit ukioqalernerminningaanniit atualernissamik tungaanut ineriartuutaasinnaasumik sammisaqartittarnerisigut atualernissaannut piareersarnissaat.

Naapeqatigiinneq:

Juunip 10.-aniit 13.-iat 2010 ilanngullugu Nanortalimmi naapeqatigiinneq ingerlanneqarpoq. Tassani aaqqissuisuupput Kommune Kujallermi atuartaaneq meeqquveqarnermullu ingerlatsivik kiisalu Namminersorlutik Oqartussat (KIIIN).

Siunertaq:

Siunertarineqarpoq ukiuni tallimani kingullerni Nanortalip Kommunerisimasaani (Kommune Kujallermi 2009-mit) ingerlanneqarsimasup naliliiffiqineqarnissaa, kiisalu tassanngaanniit ingerlariaqqinnissaq sammineqassasoq, sulisorisattalu meeqqanik sullissinnerminni periusarisartagassaannik atortorisinnaasaannillu isumasioqatigiinneq atortuusinnaasunillu pilersitsiortorreq.

Peqataasut:

Peqataapput nunaqarfinni taakkunani Piukkunnarsarfinni sulisut, kiisalu nunaqarfinni taakkunani atuarfinni pisortat. Ataatsimoortinneqarnerannut pissutaavoq Piukkunnarsarfinniit atuarfinnut ikaarsaariarnerup ataqatigiissaarneqarnissaata anguniarneqarnera, kiisalu siunissami atuarfiit Piukkunnarsarfiillu sutigut ikioqatigiillutillu ineriartortitseqatigiinnissaat aqutissiuunniarlugu.

Piukkunarsarfinni sulisut: Andrea Kleist, Aappilattoq. Ingeborg Enoksen, Narsarmijit. Elise Enoksen, Tasiusaq kiisalu Miki Hansen, Ammassivik.

Atuarfinni pisortat: Larsine Levisen, Aappilattoq. Lars Ejnar Kvist, Narsarmijit. Karta Korneliussen, Tasiusaq.

Kommune Kujalleq: Atuartitaanermut meeqqeriveqarnermullu Ingerlatsivimmi pisortaq Jens Korneliussen.

Qaqortumi meeqqerivimmi Inneriilat-ni pisortaq bachelor Ivo Silassen.

Namminersorlutik Oqartussat: Ataqtigiissaarisooq Kunuunnguaq Fleischer.

Misilittakkat:

Nunaqarfinni taakkunani Piukkunnarsarfinni sulisut annertuumik nammineertitaallutik sulisimapput. Aaqqissuussineq aallarteqqaarmat katersorlugit Nanortalimmi pikkorissartinneqarnikuupput, piffissallu sinnerani sulineq ingerlanneqarpoq annertunerusumik pikkorissaanerit ingerlanneqarnatik. Taamaakkaluartoq atuarfinni nunaqarfinniittuni taakkunani suliniutip pitsaasumik sunniuteqarnera malunniutereersimavoq.

Sulisuusunit atuarfinnilu pisortaasunit meeqqat sionatigut atualersartuningarnit piareersimanagerlutik atualertarnerat malunnaateqarluartutut nalilerneqareerpoq.

Maluginiarneqartut ilagaat aningaasarpasuit atunngikkaluarlugit meeqqanik atualerneqanngitsunik piukkunnarsaaneq iluaqutaalluartoq, ukiunilu taakkunani tallimani ingerlatsineq pitsaasumik malunniuteqalereersooq. Taamaalilluni atualerlaat malunnarluartumik piareersimanagerlutik atualertalerput, tamatumalu takussutissippaa taama aaqqissuussineq akilersinnaalluartoq siunissamilu ingerlatiinnarneqarnissaa piariaqartinneqartoq.

Taama sunniuteqalereernerata aamma takutippaa angajoqqaat meeqqaminnik perorsaanerminni ineriartuutaasinnaasunik ilisimasakippallaartut, arlaatigullu aamma taakkununga suliniuteqalersinnaaneq eqqarsaatigineqartariaqassasoq.

Siunissaq:

Kommune Kujallermi aaqqissuussineq ingerlatiinnarneqassaaq, kiisalu nunaqarfinnut allanut, sionatigut Qaqortup Narsallu kommunerisimasaaniittunut siammarneqassaaq aningaasaliiffigineqareerlunilu.

Kissaatigineqarpoq Piukkunnarsarfiit atuarfiillu qanimut suleqatigiissasut, tassami Piukkunnarsarfinni suliniutip pitsaasumik atualersussanut sunniuteqarnera suli pitsaanerulersinnaassamat atuarfinni ilinniartitsisut qanimut oqaloqatigisarnerisigut, kiisalu Piukkunnarsarfinni sulisut periusisaannik ilitsersuuttarnerisigut.

Kommune Kujallermi aaqqissuussineq Namminersorlutik Oqartussat soqutigalugu peqataapput, taama aaqqissuussisimaneq nunatta sinneranut siunissami siammarneqarsinnaanera isumaliutersuutigineqarluni.

Jens Korneliussen

Atuartitaanermut Meeqqeriveqarnermullu Ingerlatsivimmi pisortaq

Kommune Kujalleq

Nanortalik 15. juni 2010.